

Fundacion Betico Croes celebrando 15 aña di existencia

ORANJESTAD (AAN): Esaki ta un relato relaciona cu 15 aña di existencia di Fundacion Betico Croes.

Tur hende ta corda cu na 1985 nos Libertador, Betico Croes na un manera misterioso a accidenta y cu na 1986 despues di 11 luna el a fayece.

Algun persona den comunidad tabata consciente di e trabao grandi cu Betico a haci pa nos Aruba. E personanan aki den termino di un pa dos luna, despues di fayecimento di Betico, a bini cu e idea pa lanta Fundacion Betico Croes. Esaki a sosode riba 14 di Januari di aña 1987.

E personanan cu a haci esaki tabata: Maxima Arendsz-Croes, Chinto Geerman, Ruben Irausquin, Basilio Kelly, Eloy Koolman, Jossy Mansur, Hendrik Oduber y Roque Solagnier.

Proposito di e Fundacion ta pa haci tur hende y tambe tur generacion cu lo sigui consciente di kico Betico ta nifica pa Aruba, di kico Betico a haci pa Aruba, di tur e sacrificianan cu Betico a haci pa logra nos Status Aparte y di tur e insultonan cu e mester a soporta pa por a logra su meta.

E Fundacion ya pa añanan

ta trahando pa logra e meta aki y nan ta kere cu e trabao no ta envano.

Poco poco tur ta realiza cu loke Betico a laga atras pa Aruba, ta herencianan valioso cu no mester laga bay perdi.

Tur aña e Fundacion ta organiza dianan unda nan ta concientiza comunidad riba e importancia di cultura, himno, bandera, e Pais y tur trabao di Libertador, Betico Croes.

Durante añanan mescos cu tur otro organizacion, directiva ta cambia y awor, despues di 15 aña e Fundacion ta consisti di: Presidente,

Maikito Croes, tesorero, Basilio Kelly, 2e tesorera, Maxima Arendsz-Croes, secretaria, Gloria Croes, y demas miembronan, Ada Croes, Susana de Vries, Edwina Croes y Hendrik Oduber.

Nan ta spera cu e aña aki e meta grandi lo ser cumpli: Pone e estatua na su lugar di natalicio, Santa Cruz y tambe pone e estatua nobo riba Plaza Libertador.

Nan meta ta su monumento y su museo na Sta. Cruz, cual pronto lo cuminsa cu su construccion.

Tramitenan ta canando den

bon camina y ta spera cu tur cos lo keda cla e aña aki, pa por cuminsa cu e trabao.

No tabata nada facil pa logra tur esaki pero nan ta spera cu tur contratiempo a pasa. Ta spera tambe cu e aña aki lo por publica e buki, describiendo e bida di Betico.

“Nos lo sigui conscientiza e pueblo. Nos trabao ta sigui te cu ora otro generacion tuma over y continua nos trabao. Nos kier a gradici tur persona, instancia y organizacion cu semper a pone nan confianza den nos Fundacion y cu semper a sa di coopera cu nos.”